

GRØNLANDS **POLITI**

Sumiiffimmi siunnersuisartut ataatsimiinnera

Sammissaq:	Sumiiffimmi siunnersuisartut ataatsimiinnera
Ulloq:	11. september 2024
Piffissaq	09.00-12.00
Sumiiffik:	Café Tamu, Nuuk
Eqikkaasoq:	Sekretariatschef (fg.)
Ataatsimeeqataasut:	Politiit pisortaat, Chefpolitiinspektøri, Vicepolitiinspektøri (Operativ Stab), Inuussutissarsiornermut, Niuernermut, Aatsitassanut, Inatsisit Attuutsinneqarnerannut Naligiissitaanermullu Naalakkersuisoq, Inuussutissarsiornermut, Niuernermut, Aatsitassanut, Inatsisit Attuutsinneqarnerannut Naligiissitaanermullu Naalakkersuisoqarfimmi pisortaaq, Isumaginninnermut, Ilaqutariinnut, Suliffeqarnermut Nunamullu Namminermut Naalakkersuisoq, Isumaginninnermut, Ilaqutariinnut, Suliffeqarnermut Nunamullu Namminermut Naalakkersuisoqarfimmi pisortaaq, Meeqqanut, Inuusuttunut, Ilinniartitaanermut, Kultureqarnermut Timersornermut Ilageeqarnermullu Naalakkersuisoq, Meeqqanut, Inuusuttunullu Naalakkersuisoqarfiani pisortaaq, Angingaasaqarnermut Akileraartarnermullu, Styrelseschef i Akileraartarnermut Aqutsisoqarfimmi aqutsisoqarfiup pisortaa, Peqqinnissamut Naalakkersuisoq, Avannaata Kommuniani Borgmesteri, Avannaata Kommuniani Kommunaldirektøri, Qeqqata Kommuniani Borgmesteri, Qeqqata Kommuniani Kommunaldirektøri, Kommuneqarfik Sermersuumi Borgmesteri, Kommuneqarfik Sermersuumi Kommunaldirektøri, Kommune Kujallermi Borgmesteri taavalu Kommune Kujallermi

Kommunaldirektøri.

Peqataanngitsut:

Kommune Qeqertalimmi Borgmesteri

Ullormut

oqaluuserisassat:

1. Ataatsimiinnerup kingulliup imaqarniliornerata akuersissusitigineqarnera
2. Kalaallit Nunaata Politiiviniit paasissutissiineq
 - a. Najukkami siunnersuisoqatigiit nalunaarutaat
3. Naalakkersuisunit paasissutissiinerit
 - a. Inuussutissarsionernut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq (siulittaasup tullia)
 - b. Meeqqanut, Inuusuttunut, Ilinniartitaanermut, Kultureqarnermut Timersornermut Ilageeqarnermullu Naalakkersuisoq
 - c. Isumaginninnermut, Ilaqutariinnut, Suliffeqarnermut Nunamullu Namminermut Naalakkersuisoq
4. Kommunenit paasissutissiinerit
 - a. Kommune Kujalleq
 - b. Kommuneqarfik Sermersooq
 - c. Qeqqata Kommunia
 - d. Kommune Qeqertalik
 - e. Avannaata Kommunia
5. Siunnersuutit tiguneqarsimasut
 - a. Suleqatigiinnissamut isumaqatigiissut (Kalaallit Nunaata Politiivi)
 - b. Aanngajaarniutit sakkortuut (Inuussutissarsionernut, Niuernermut, Aatsitassanut, Inatsisit Atuutsinneqarnerannut



Naligiissitaanermullu Naalakkersuisoq)

c. Pinaveersaartitsineq pillugu siunnersuisooqatigiinnik
ataatsimiititalianillu pitsanngorsaaneq (Meeqqanut,
Inuusuttunut, Ilinniartitaanermut, Kultureqarnermut,
Timersornermut Ilageeqarnermullu Naalakkersuisoq)

d. Inuusuttut pinerluttulerinermut akuusut ikiorsiinissamullu
periarfissat (Qeqqata Kommunianni Borgmesteri)

e. Politiit takussaanerat pissarsiariuminarnallu pillugu
(Kalaallit Nunaata Politiivi)

f. Qqartussaasut innuttaasunik eqqarsartaatimikkut
ajornartorsiuteqqartunik naapitsiriaaseqarnerat
pissusilersorfiginnittarnallu (Kalaallit Nunaata Politiivi)

6. Tamalaat

7. Ataatsimiinnissap tulliaat ullulernerqarnissaa



Ad 1 – Ataatsimiinnerup kingulliup imaqarniliornerata akuersissusitigineqarnera

Politiit pisortaat sumiiffimmi siunnersuisut aallartinneranniit ataatsimiinnermut tulluuttumut tikilluaqqusivoq. 21. februar 2024 ataatsimiinnermit imaqarniliaq akuerineqarpoq allannguutissatut siunnersuuteqartoqarani.

Ad 2 – Kalaallit Nunaata Politiiviniit paasissutissiineq

Kalaallit Nunaata Politiivi aallarniillutik nuna tamakkerlugu pinerluttarnerup siuariartornera saqqummiuteqqaarpaat, tassani annerusumik ukkatarineqarsimallutik meeqqanut kinguaassiuutitigut pinerliisarnarit, nakuusertoqarsimatillugu suliat, imminut toquttarnarit kiisalu ikiaroonartut pillugit kisitsisaatit.

Aammattaaq Kalaallit Nunaata Politiivisa oqaatigaat pilersaarusiukkamik pinerluttarneq, ilaatigut ikiaroonartulerineq, politiit ingerlaginnartumik annertusisamik ukkatarigaat, aammalu Nunatsinni oqartussaasut akunnerminni pitsaasumik suleqatigiinnerat pingaaruteqartuusoq, pinerluutit akerlilerniarlugit.

Ad2a Najukkami siunnersuisoqatigiit nalunaarutaat

Chefpolitiinspektørup oqaluttuaraa ukioq qaangiutereerpat Nunatsinni tamarmik najukkami siunnersuisut pilersinneqarsimanissaat anguniagaasoq. Erseqqissaatigaa najukkami siunnersuisut aqqutigalugit siunertarineqartoq sumiiffinni suliniutit assigiinngitsut katersornissaat. Tamatuma saniatigut tassunga atatillugu inuiaqatigiit patajaannerat nukittorsarneqassaaq, aammalu najukkami ataqatigiissaarinissaq piviusunngortitsinissarluk nukittorsarniarlugit attaveqaaqatigiiffissaq pilersinneqassaaq. Aammattaaq chefpolitiinspektørup eqqaavaa najukkami siunnersuisoqatigiit nalilersuiffigineqarumaartut, ilaatigut pinaveersaartitsinermik suliaqartut akunnerminni imminnut qanoq sunniuteqarsinnaaneri misissorneqassalluni.

Vicepolitiinspektørup (Operativ Stab) kommunini najukkami siunnersuisoqatigiit qanoq inissisimaneri saqqummiuppai.

Aammattaaq vicepolitiinspektørup ilisimatitsissutigaa najukkami siunnersuisoqatigiit tukimut suleqatigiinnermut nukittorsaataasimasut.

Najukkami siunnersuisoqatigiit pilersinneqarnissaannut inissisimaffimmut atatillugu Vicepolitiinspektørup oqaatigaa Kommuneqarfik Sermersuup Najukkami Siunnersuisoqatigiit Killiit oktoberimi/novemberimi aammalu Kommune Qeqertalimmi oktoberimi/novemberimi sammisaqartitsisoqassasoq. Taakku saniatigut Najukkami Siunnersuisoqatigiit Kangilliit sammisaqartitseqqammerput. Sammisaqartitsinerni najukkami suliaqartut pingaarutillit



kikkuussusersineqarusupput, annermik pinaveersaartitsinerup iluani aammalu ajornartorsiutit suussusersineqarnissaannut.

Isumaginninnermut, Ilaqutariinnut, Suliffeqarnermut Nunamullu Namminermut Naalakkersuisup erseqqissaatigaa ajunngitsuusoq tusarlugu najukkami siunnersuisoqatigiit pitsaasunik aaqqissuusisut kiisalu najukkani aaqqissuussanik iluarisimaarneqartunik suliaqartoqarnissaa sulissutigineqartoq. Aammattaaq Naalakkersuisup eqqaavaa "qulaaniit" aaqqiisoqarnissaa utaqqineqarajuttoq, paarlattuanilli sumiiffinni najugaqartut akuutinneqarnerusariaqaraluartut, taakkuummatami pingaarutilinnik ilisimasallit. Aammattaaq Naalakkersuisup siunnersuutigaa politiit atuarfinnut pulaakulanerunissaat sulinertik pillugu oqaluttuariartorlutik, taamaaliorneq pinaveersaartitsinermik suliaqarnermut ilaasinnaammat.

Meeqqanut, Inuusuttunut, Ilinniartitaanermut, Kultureqarnermut, Timersornermut Ilageeqarnermullu Naalakkersuisup erseqqissaatigaa pingaaruteqartoq oqartussaasut pinaveersaartitsinermik suliaqarnermut suleqatigiinnissaat kissaatigalugulu pineqartup nukittorsarneqarnissaa. Sumiiffimmi siunnersuisoqatigiit suliamut tassunga katersuuffittut pitsaasutut isigai. Aammattaaq Naalakkersuisup erseqqissaatigaa imminut toquttarneq pillugu suliaqarnermut suleqatigiinnissaq pisariaqartoq neriuutigalugulu najukkami siunnersuisoqatigiit ataatsimiittarnerini imminut toquttarneq sammisassatut aalajangersimasutut inissinneqartassasoq. Aammattaaq Naalakkersuisup siunnersuutigaa isumaginninnermik aammalu peqqinnissamik suliaqarnermi angalasartussanik pilersitsoqarnissaa, taakkunani Kalaallit Nunaata Politiivi kommunillu peqataatitaqarsinnaassallutik.

Politiit pisortaat erseqqissaatigaa Kalaallit Nunaata Politiivi pinaveersaartitsilluni suliniutigineqartunut peqataarusuttorujussuusut, angalasartuugaluarpata allatulluunniit. Taamaattorli Politiit pisortaat angalasartut pillugit erseqqissaatigaa politeeqarfinni assigiinngitsuni Kalaallit Nunaata Politiivisa sulisui peqataatitassatut tulluarluarsinnaasut, sumiiffigisaminni pissutsinik ilisimasaqartuummata.

Kommune Kujallermi Borgmesterip nuannaraa 2024-mut Aningaasanut inatsisissami aningaasaliissutissanik illikartitsisoqarsimammat, taamaalilluni Qaqortoq akitsuuserisogalissalluni. Taamaalillui Nunatta Kujataani ikiaroornartoq eqqarsaatigalugu pitsanngoriartoqarnissaanut neriuuteqalersitsimmat.

Aammattaaq Kommune Kujallermi Borgmesterip erseqqissaatigaa tigummigallagaasut isertitsivinniittariaqartarnerat unammillernartuusoq. Tassunga Inuussutissarsiornermut,



Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisup oqaatigaa tamanna Justitsministerimut saqqummiuttuarterlugu aammalu Rådet for Grønlands Retsvæsenip ataatsimiinnerani kingullermi eqqartorneqartut ilagisimagaat.

Politiit pisortaat naavaa piumasaralugu najukkami siunnersuisoqatigiinni peqataasut Kalaallit Nunaata Politiiviniit inuulluaqqusummik nassinneqassasut oqaatigalugulu Kalaallit Nunaat Politiivisa misigigaat najukkami siunnersuisoqatigiinni sulineq kommunini sulisunit annertuumik tapersorsorneqartoq.

Ad 3 – Naalakkersuisunit paasissutissiinerit

Ad 3a Inuussutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq

Inuussutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisup pineqaatissiisarnermut sinaakkutit sukateriffigineqarnissaat kiisalu inissiisarfinni inissanik amigaateqarneq pillugit peqqissaarussineq amigaatigalugu oqariartuutigaa. Naalakkersuisoq isumaqarpoq tamakku inuiaqatigiit naapertuuttumik misiginissaannut pingaaruteqartut. Naalakkersuisut immikkoortut taakku qallunaat oqartussaasuinut suli erseqqissaatigisarniarpaat.

Inuussutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisup aammattaaq eqqugaasimasunut siunnersuisarnissap suliarinerata ajornarsimanera ilanngullugu oqaatigaa. Tamatuma saniatigut Nunatsinni atulernissaanut ilusissaata qanoq innissaata misissorluarnissaa pisariaqarpoq, Danmarkimi piumassutsimikkut sulisut atorineqarmata, tamanna nunatsinni piumassutsimikkut ikittuinnaat sulerusunnerannik unammillernarsinnaammat.

Ad 3b Meeqqanut, Inuusuttunut, Ilinniartitaanermut, Kultureqarnermut, Timersornermut Ilageeqarnermullu Naalakkersuisoq

Meeqqanut, Inuusuttunut, Ilinniartitaanermut, Kultureqarnermut, Timersornermut Ilageeqarnermullu Naalakkersuisup pinaveersaartitsinerup aammalu siusissukkut iliuuseqarnissap nukittorsarnissaannut kissaat eqqaaqqippaa, Naalakkersuisoq isumaqarami sammisaq taanna naammattumik ukkatarineqanngitsoq. Tassani Meeqqanut, Inuusuttunut, Ilinniartitaanermut, Kultureqarnermut, Timersornermut Ilageeqarnermullu Naalakkersuisup kommunit allallu suliaqartut pingaarutillit allatigut suleqatigeqqikkusuppai.



Meeqqanut, Inuusuttunut, Ilinniartitaanermut, Kultureqarnermut, Timersornermut Ilageeqarnermullu Naalakkersuisup aammattaaq eqqaavaa isumaginninnermi sulisoqarniarneq aammalu kommuninik suleqateqarnermi pineqartup nukittorsarnissaata pingaaruteqarnera unammillernartuusut.

Ad 3c Isumaginninnermut, Ilaqutariinnut, Suliffeqarnermut Nunamullu Namminermut Naalakkersuisoq

Isumaginninnermut, Ilaqutariinnut, Suliffeqarnermut Nunamullu Namminermut Naalakkersuisup tikkuarpaa Naalakkersuisumut pingaaruteqartoq kommunit aammalu Kalaallit Nunaata Politiivisa pinaveersaartitsinermik suliaat pillugit tusarfigissallugit, taamaalilluni Naalakkersuisoq pineqartup nukittorsaqqinnissaanut suliniuteqaqqissinnaassammat. Najugaqartut ukkatarinissaat aammalu pinaveersaartitsinermik suliniutit suut suliniutigeqqinnissaat eqqarsaatigalugit ilisimasaat atorluassallugit pingaaruteqarpoq.

Isumaginninnermut, Ilaqutariinnut, Suliffeqarnermut Nunamullu Namminermut Naalakkersuisup aammattaaq isumaqarpoq ineqarneq ukkatarissallugu pingaaruteqartoq, tamanna ilaqutariit pissusiinut aammalu ilaqutariit atugarisamikkut peqqissutsimikkullu qanoq innerannut pingaaruteqarmat.

Isumaginninnermut, Ilaqutariinnut, Suliffeqarnermut Nunamullu Namminermut Naalakkersuisup aammattaaq eqqaavaa sulisut avataaniit tikisitat ukkatarineqarnissaat pingaaruteqartoq, tak. ajornerusumik atugassaqaartitsineq aammalu unioqqutitsilluni sulisoqarneq pillugit pisut kingulliit.

Ad 4 – Kommunenit paasissutissiinerit

Ad 4a Kommune Kujalleq

Kommune Kujallermi Borgmesterip aallarniutigalugu oqaluttuaraa suli ilinniarneqartoq, kisiannili najukkami siunnersuisut iluaqutaasut, assersuutigalugu kommunimi pinerluttarnerup siuariartorneranut tunngatillugu Kalaallit Nunaata Politiivisa kisitsisaataasigut ilisimalikkat kommunip paasisimavai.

Kommune Kujallermi Borgmesterip oqaluttuaraa nutaatut misiligutigalugu Meeqqat Ulluanni imigassamik aalakoorartulimmik tuniniaaneq matoqqatissimallugu.



Borgmesterip aammattaaq tikkuarpaa ikiaroonartut tungaasigut pinaveersaartitsinermik suliaqarneq unammillernarsimasoq, aammalu tamanna pillugu tukimut suleqatigiinnissaq pisariaqartinneqartoq. Isumaqarpoq Kalaallit Nunaata Politiivi kisiisa isumalluutigineqarsinnaanngitsut, kikkulli tamarmik suleqatigiittariaqarput.

Kommune Kujallermi Borgmesteri Nanortalimmi pinaveersaartitsilluni suliamut immikkut nersorinnippoq. Erseqqissaatigaa politeeqarnikkut pinaveersaartitsilluni suliniut inuiaqatigiinnut sunniuteqarluarsimasoq. Borgmesterip kajumissutsiminnik suliaqartut annertuumik qutsavigerusuppai pinaveersaartitsilluni suliaqarnermut pingaaruteqaqimmata.

Ad 4b Kommuneqarfik Sermersooq

Kommuneqarfik Sermersuumi Borgmesterip ilaqutariit pillugit nutaatut politikkissaq oqaluttuaraa, tassani pinaveersaartitsineq, siusissukkut iliuuseqarneq aammalu ilaqutariit ataatsimut meerarlu kisiaanngitsaq ukkatarineqassallutik. Tamakku saniatigut inunnik isumaginninnermik suliaqartut ilinniarteqqinneqassapput ilitersuisunik pilersitsisoqassaaq.

Ittoqqortoormiini pitsaasumik ineriartorneq borgmesterip oqaluttuaraa. Siuliini inuttut atugarisatigut unammillernartoqarsimavoq, maannali pitsaasumut ineriartortoqarpoq. Inunnik isumaginninnermi sullissisut peqataasorujussuupput, qujanartumillu misigisimapput suliaq oqiliartortoq. Pinaveersaartitsilluni suliniutit sunniuteqarsimapput.

Ad 4c Qeqqata Kommunia

Qeqqata Kommuniani Borgmesterip eqqaavaa najukkami siunnersuisuni suleqatigiinneq iluatsilluarsimasoq.

Borgmesterip inuusuttut taakkuugajuttut sakkortusaartartut iperagaasimallutik aallarteqqissimaneri unammillernartuusoq erseqqissaatigaa, tamannali oqaluuserisassani 5d-mi itisilerumaarlugu.

Ad 4d Kommune Qeqertalik

Kommune Qeqertalimmiit peqataasoqanngilaq.

Ad 4e Avannaata Kommunia



Avannaata Kommunian Borgmesterip kajumissutsiminnik suliaqartut pingaaruteqassusaannik oqarnek taperserpaa. Tassunga borgmesterip eqqaavaa Ilulissani Kalaallit Nunaata Politiivini aammattaaq kajumissutsiminnik suliaqartoqartoq. Kajumissutsiminnik suliaqartoq illersorneqarnissaa pingaaruteqarpoq, nukissaarutinnginniassammata. Malugineqarsinnaalluarterpoq kajumissutsiminnik suliaqartut suliunnaaraangata sulineq unittartoq.

Avannaata Kommuniani Borgmesterip erseqqissaatigaa Upernavimmi annermik pinaveersaartitsinermik suliaqarnermut politiit tungaanniit ersarinnerusoqassasoq.

Avannaata Kommuniani Borgmesterip naggasiullugu erseqqissarpaa najukkami siunnersuisut Kalaallit Nunaata Politiiviniq suleqateqarneq ajunngitsuusoq, aammalu suli nukittorsarusullugu.

Ad 5 – Siunnersuutit tiguneqarsimasut

Ad 5a Suleqatigiinnissamut isumaqatigiissut (Kalaallit Nunaata Politiivi)

Politiit pisortaat eqqaavaa suleqatigiinnissamut isumaqatigiissut sumiiffimmi siunnersuisuni ilaasortanut nassiunneqareersoq aammalu sualummik ukkatarisassat Inuussutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq peqatigalugu eqqartorneqarsimasut. Immikkoortumut oqaaseqartoqanngilaq.

Ad 5b Aanngajaarniutit sakkortuut (Inuussutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq)

Inuussutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisup aallarniutigalugu erseqqissarpaa ikiaroorartut, sualummik sakkortuut, akiorneqarnerannut suliniutip nukittorsarneqarnissaa pingaaruteqartoq, piffissami matumani katsorsaanissaq eqqarsaatigalugu periarfissat killeqarmata. Tamatuma saniatigut inatsiserpaaluupput suli inissinneqanngitsut.

Tassunga atatillugu Inuussutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisup akitsuuserisoqarnera erseqqissarpaa, tamatumani ilaatigut Nunatsinni inoqarfiit qeqertaasarneri taamalu pulaterfissarpassuunerisa unammillernartarneri. Taamaalluni akitsuuserisut ikiorneqarnissamik pisariaqartitsipput, suliassaq kisimik nammassinnaanngimmassuk.



Inuussutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisup aammattaaq tikkuarpaa aqqusinertigut angallannermut inatsisip nutarternissaata pisariaqarnera. Allangortittariaqarpoq, ikiaroorartumik sunnerneqarsimatilluni ingerlatitsisoqaqqusaajunnaarlugu.

Inuussutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisup erseqqissarpaa kissaatigalugu ikiaroorartuq pillugu nalunaarsuutunik pitsaanerusunik peqalernissaq. Tamatumani piviusumit allattuiffiit oqartussanut tamanut pilersinneqartariaqartut.

Aningaasaqarnermut Akileraartarnermullu Naalakkersuisup erseqqissarpaa akitsuuserineq pillugu suleqatigiinnerup nukittorsarneqarnissaa pingaaruteqartoq. Tamatumani erseqqissarpaa Skatteministeqarfimmik suleqatigiinnissamik isumaqatigiissut nutaq aammalu Skatteministeri tikeraarmat Kalaallit Nunaata Politiivi ataatsimeeqatigineqarsimasut.

Aningaasaqarnermut Akileraartarnermullu Naalakkersuisup tikkuarpaa takuneqarsinnaalluortoq ikiaroorartumut tunngatillugu annertuunik unammillernartoqartoq, taamaammallu tamatumunnga nukittorsaasoqarnissaa pisariaqartoq. Tamanna pillugu Naalakkersuisut 2025-mut kingornalu aningaasanut inatsisissami 5 mio kr.-inik illikartitsiniarput.

Aningaasaqarnermut Akileraartarnermullu Naalakkersuisup aammattaaq eqqaavaa ikiaroorartunut tunngatillugu politiinik suleqateqarneq pitsaasuusoq. Naggataatigut unammillernartuunera tikkuqaqqippaa oqarluni attuumassutillit tamatta suleqatigiittariaqartugut, ilaatigut Allorfik, peqqinnissaqarfik, inatsiseqarneq, kommunit il.il.

Ad 5c Pinaveersaartitsineq pillugu siunnersuisooqatigiinnik ataatsimiititalianillu pitsanngorsaaneq (Meeqqanut, Inuusuttunut, Ilinniartitaanermut, Kultureqarnermut, Timersornermut ilageeqarnermullu Naalakkersuisoq)

Ullormut oqaluuserisassani immikkoortoq peerneqarpoq Meeqqanut, Inuusuttunut, Ilinniartitaanermut, Kultureqarnermut, Timersornermut ilageeqarnermullu Naalakkersuisup piomasaqarneratigut.

Inuussutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisulli ilaasortanut apeqqutigaa suleqatigiissitaliortoqarsinnaanersoq, tassani peqataasut Meeqqanut, Inuusuttunut,



Ilinniartitaanermut, Kultureqarnermut, Timersornermut Ilageeqarnermullu Naalakkersuisup sulineranut ilanngussaqsinnaasassallutik. Tamanna taparserneqarpoq.

Ad 5d Inuusuttut pinerluttulerinermut akuusut ikiorsiinissamullu periarfissat (Qeqqata Kommuniani Borgmesteri)

Qeqqata Kommuniani Borgmesterip nalilerpaa inuusuttut sakkortusaartartut inissiisarfinnut pinissartik ernumagisaanngikkaat, sakkortusaartarnertik ingerlatiinnartaramikku inissiisarfinniit aneqqikkaangamik. Tamatumunnga borgmesteri aperivoq inissiisarfinni katsorsaanissamut periarfissaqannginnersoq.

Inuussutissarsiornermut, Niuernermut, Aatsitassanut, Inatsisit Atuutsinneqarnerannut Naligiissitaanermullu Naalakkersuisup inissiisarfinni katsorsarneqarnissamut periarfissat amigaataanerannut ernummatit ilisarai. Naalakkersuisup eqqaavaa Rådet for Grønlandske Retsvæsenimik ataatsimeeqateqarnissamut tamanna eqqartorniarlugu. Eqqaavaa inissiisarfinni suliaqartitsinissamut sulisut tigummiinnarnissaat unammillernartut ilagigaat.

Kommune Kujallermi Borgmesterip eqqaavaa inuusuttut sakkortusaartarnerannut peqqutit ilagigaat annertuumik sumiginarneqarsimaneq misigittaassusermik pilersitsisarteq. Annertuumik sumiginnaaneq annertuumik meeqqamut sunniuteqartarpoq. Aammattaaq isumaqarpoq katsorsaanissamik eqqartuussutit naammattanngitsut, tamannalu ilimanarteq sinerissami nakorsaat aalaakkaasut pigineqajuinnerannik taamalu paarlakaannerujussuannik pissuteqaratarsinnaasoq. Taamaalillutik nakorsat najukkami inuiaqatigiinnik ilisimanninnerat killeqalersimavoq. Kommuneq Kujallermi Borgmesterip naggasiutigalugu erseqqissarpaa aaqqissuussaanerput qiviaqqittariaqaleripput.

Avannaata Kommunia Kommunaldirektørip nalunaarutigaa kommuni Pinerluttunik isumaginnittoqarfik ataqatigiissaarisoralugu ataatsimiinnermut peqataasimasoq, ilaatigut eqqartorneqarsimallutik tigusarineqarsimasut inissiisarfinniit anigaangata najugaqatigiiffiusinnaasut amigaataaneri, tamanna peqqinnanngitsumik avatangiisinut utikattuarnerrannut pissutaasinnaammat. Neriutigineqarpoq tamannattaaq ukkatarineqarumaartoq.

Kommuneqarfik Sermersuumi Borgmesterip erseqqissaatigaa meeqqanut tunngatillugu pinaveersaartitsineq siusissukkullu iliuseqarnissaq pisariaqartinneqartoq, taamaalillutik pinerluttalinnginniassammata.



Ad 5e Politiit takussaanerat pissarsiariuminernerallu pillugu (Kalaallit Nunaata Politiivi)

Qeqqata Kommunia Borgmesteri aperivoq politiit unnukkut/unnuakkut sulinerat inoqarfiit sinnerini Nuummilu assigiinngissuteqarnersut. Aammattaaq borgmesterip erseqqissaatigaa kissaatigalugu politiit tungaanniit ersarinnerusitsinissaq. Tassunga Politiit pisortaat akivoq Nuummiinnaq akunnernik 24-nik aaqqiissuteqartarneq atuuttoq. Nuup avataani inoqarfinni nalinginnaasumik ammasarfiup avataatigut Nuummi vagtcentrali attavissaavoq. Taamaattorli sumiiffinni ulloq unnuarlu sillimasunik sulisoqartarpoq. Aammattaaq Politiit pisortaat erseqqissaatigaa torersuutitsinissaq imerniartarfinnik piginnittut akisussaaffigigaat. Imerniartarfinnili pinerluttoqarpat politiillu attavigineqarpata, soorngunalimi politiit ornigutissapput.

Politiit pisortaat erseqqissaatigaa Nuup avataani inoqarfinni piffissat suliffissat ass. aningaasarsiffinni tulluarsarfiginiarneqartartut.

Politiit pisortaat naggataatigut oqaatigaa 2024-p ingerlanerani naammagisimaarinninneq aammalu toqqissisimaneq pillugit misissuisitsinissaq Justitsministeriaqarfimmiit sulissutigineqartoq.

Ad 5f Oqartussaasut innuttaasunik eqqarsartaatimikkut ajornartorsiuteqartunik naapitsiriaaseqarnerat pissusilersorfiginnittarnerallu (Kalaallit Nunaata Politiivi)

Piffissakilliorneq pissutigalugu immikkoortoq taanna sumiiffimmi siunnersuisut ataatsimiinnissaannut tullermut kinguartinneqarpoq. Aammattaaq kissaatigineqarpoq imminut toquttarneq immikkoortumut tassunga ilanngunneqassasoq.

Ad 6 – Tamalaat

Tamalaani ilassutissaqartoqanngilaq.

Ad 7 – Ataatsimiinnissap tulliata ullulernerneqarnissaa

Isumaginninnermut, Ilaqutariinnut, Suliffeqarnermut Nunamullu Namminermut Pisortaqarfik suleqatigalugu ullussaa aalajangerneqassaaq Politikikkut ataqatigiissarisut suleqatigiit ataatsimiinnissaat eqqarsaatigalugu.

